

## **Бақара сураси, 231-оят**

16:18 / 12.03.2018 2994

**Хотинларни талоқ қилганингизда, муддатлари охирига етганда,  
уларни маъруф ила ушлаб қолинг ёки маъруф ила қўйиб юборинг.  
Уларни тажовуз қилиш учун, зарар етказиш юзасидан ушлаб  
турманг. Ким ўшани қилса, шубҳасиз, ўзига зулм қилибди.  
Аллоҳнинг оятларини эрмак қилманг. Аллоҳнинг сизга берган  
неъматини ва ваъз этиб нозил қилган Китоб ва ҳикматни эсланг.  
Аллоҳга тақво қилинг ва билингки, албатта, Аллоҳ ҳар бир нарсани  
ӯта билувчиdir. Бақара 231.**

Аввалги оятлардан аёл киши талоқ қилинганидан кейин ҳам то иддаси чиққунча эрининг ихтиёрида туришини билдик. Иддаси чиққанидан кейин эса эрга берилган бу имтиёз ўз кучини йўқотади. Иддаси охирига етганда нима қилиш керак? Ояти карима кўрсатма бермоқдаки,

**«Хотинларни талоқ қилганингизда, муддатлари охирига етганда,  
уларни маъруф ила ушлаб қолинг ёки маъруф ила қўйиб юборинг».**

Яъни ундаи ҳолда икки ишдан бирини қилинг.

Биринчиси ва зарури: «Уларни маъруф ила ушлаб қолинг», яъни «Эр-хотин бўлиб, яна яхшилик билан оилавий турмушни давом эттиринг». «Яхшилик билан» дегани хотинга таъна қилиб, уни уриб-сўкиб, миннат қилиш йўли билан бўлмасин, деганидир.

Иккинчиси ва ноиложликдан бўладигани – қўйиб юбориш. Модомики, талоқдан сўнг, иддаси чиққач ҳам ярашиш нияти йўқ бўлса, унда ажрашсинлар. Аммо бу яхшилик билан бўлгани яхши.

**«Уларни тажовуз қилиш учун, зарар етказиш юзасидан ушлаб  
турманг».**

Тажовуз учун, хотинни қийнаш мақсадида ушлаб туришнинг қандай бўлишини юқорида келтирилган мисолдан кўрдик. Ислом бундай зулмни хотинларнинг елкасидан олиб ташламоқда. Эркаклар масъулиятни сезсинлар, хотинларни азоблашга ўтмасинлар. Агар улардан:

**«Ким ўшани қилса, шубҳасиз, ўзига зулм қилибди».**

Чунки у одам мана шу иши билан ўзини ўзи Аллоҳнинг иқобига тутган бўлади.

### **«Аллоҳнинг оятларини эрмак қилманг».**

Балки унга жиддий қаранг. Оилавий масала, талоқ ва унга тегишли ишлар ниҳоятда жиддий бўлмаганида, Аллоҳ таоло уларни Қуръон оятлари қилиб нозил қилмас эди. Исломда оилавий ҳаётга, талоқ масаласига ниҳоятда жиддийлик билан қаралади.

Талоққа ноиложлиқдан рухсат берилган, чораси қолмаган ҳолда ишлатиш учун у ҳалол қилинган. Набий алайҳиссалом:

### **«Аллоҳнинг энг ёмон кўрган ҳалоли талоқдир, унга Роҳманнинг Арши ларзага келади», – деганлар.**

Оила масаласи ниҳоятда муҳим масала бўлганидан бу бобда умуман ҳазилга рухсат йўқ.

Имом Термизий Абу Ҳурайра розияллоҳу анҳудан ривоят қилган ҳадисда Пайғамбар алайҳиссолату вассалом:

**«Уч нарсанинг жиддийси ҳам жиддий, ҳазили ҳам жиддий: никоҳ, талоқ ва (талоқдан) қайтиш»,** – деганлар. Яъни бу ишларда бирор гапни айтиб ёки қилиб, кейин «Ҳазиллашган эдим», деб бўлмайди.

Мусулмонлар учун ҳаётни ҳазил фаҳмлашга, ўзини масъулиятысиз сезишга ҳеч йўл йўқ. Аллоҳ таоло бу умматнинг елкасига ер юзида Ўзининг халифаси бўлишдек улкан масъулиятни юклаган. Шунинг учун ҳазилни йиғишиштириб, масъулиятысизликни бир ёққа қўйиб:

### **«Аллоҳнинг сизга берган неъматини ва ваъз этиб нозил қилган Китоб ва ҳикматни эсланг».**

Аллоҳнинг улуғ неъмати – Исломни дин ва Муҳаммад алайҳиссаломни пайғамбар қилиб юборишидир. Ваъз этиб нозил қилган Китоби – Қуръони Карим. Ҳикмат – Набий алайҳиссаломнинг суннатлари. Бу нарсаларни доимо эсда тутиш, улар асосида илоҳий кўрсатмаларга амал қилиб яшашгина инсонга баҳт келтиради, шу жумладан, оилавий ҳаётда ҳам.

Ояти кариманинг охирида Аллоҳ мусулмонларнинг қалбларини яна бир бор уйғотиб:

**«Аллоҳга тақво қилинг ва билингки, албатта, Аллоҳ ҳар бир нарсани ўта билувчиидир», - дейди.**

Юқоридаги ояти каримада талоқдан кейин эр-хотинларнинг ўзаро яхшилик билан ярашиб ёки ажрашиб кетишлари ҳақида сўз кетди. Аммо баъзи ҳолатларда бу масалага қариндош-урұғлар ҳам аралашиб қоладилар. Улар эр-хотинни яраштириш учун аралашсалар, бош устига. Лекин гоҳида улар ярашиш йўлига тўсиқ бўладиган ҳоллар ҳам учраб туради. Келаси ояти каримада худди мана шу масаланинг ҳукми баён қилинади.